



Tsi Wá:ton tsi Enskarihwahserón:ni - Tsi Niká:ien Rati'terón:tahkwe ne Ronnonkwehón:we Tsi Ionteweiënsta Ronwati'terontákhkwa

To'nikonhráksen tsi nihonwatiierá:se ne ratiksa'okón:a iahonwanaténniehte Ronnonkwehón:we Tsi Ionteweiënstákhkwa Ronwati'terontákhkwa.

Sénha kari:wes tsi ní:ioht ne énska tewen'niáwe niiohserá:ke, sénha ronakiohkowá:ne tsi ní:ioht ne 150,000 nihá:ti ne ronnonkwehón:we ratiksa'okón:a Ronnonkwehón:we Tsi Ionteweiënstákhkwa Ronwati'terontákhkwa ia'tehonatotéhton. Wa'thonwatikháhsi ne ratiksa'okón:a tánon raotihwá:tsire tánon tsi ratinakerahshera:ke.

1870 shiihseraténion, ne ahatihsere ne kakoráhtshera tsi entá:on iá:ken enhontéweiënste ne ronnonkwehón:we ratiksa'okón:a, kakoráhtshera tahontáhsawen ne tsi ionteweiënstákhkwaniónhkwa wahonwati'teron. Teiori:wake rotirihwaién:tahkwe tsi wahonwati'teron ne tsi ionteweiënstákhkwa. É:ren ahonwatiia'tenhá:wihte tsi rati:teron tánon ahonwatiia'tón'neke kahwatsirá:ke tánon tsi nihotirihò:ten tánon aónskon akará:kewen tsi ronnonkwehón:we. Ne ón:ni eh nahatí:iere né:e tsi sénha ehtá:ke wahonión:ni tsi ní:ioht tsi thonnehtákhkwa tánon tsi nihotirihò:ten ne Ronnonkwehón:we. Tho ní:ioht tsi tehonwatiká:nere tsi iah sha'tenonáthe ne ratihnará:ken. Kwah ohrihwí:io tsi wahonni:ron "Sé:rio tsi Ronnonkwehón:we ne Ratiksa'okón:a". Ón:wa wenhniseraténion, iakwaién:tere's tsi iah tetkaié:ri tsi nikaié:ron. Kwah í:ken tsi wa'akhikaré:wahte tánon iah eh teionkwarihò:ten tsi tewanakerahshera:ke.

Énska tewen'niáwe tánon áhsen niwáhsen tékeni tsi ní:kon tsi ionteweiënstákhkwaniónhkwa kakoráhtshera ratikária'kswe Ontariíohne nón:we. Iah ne Newfoundland, New Brunswick tánon Prince Edward tsi Tkawè:note nón:we. Thò:rha akwé:kon tehotiienawá:kon ne Anglican, Tehatiahsonthá:ke, Presbyterian tóka' ni' Tekaiewá:kon Tsi Ononhsatokenhti:ke (United Churches). Koráhne Raotikoráhtshera wahatinonhsonniánion tsi ionteweiënstákhkwaniónhkwa tánon khiahonwatiia'ténhawe ne ratiksa'okón:a iotká:te í:nón tsi nón:we nihati'terón:tahkwe. Iah teioiánere tsi nón:we nahonwati'teron, iah teioiánere tsi

ní:ioht tsi wahonwati:nonte tánon iah teioiánere tsi ní:ioht tsi tahonwati:ien ne atsherónnia. Akwé:kon wahonwatiíkhwa ne raotihwá:tsire raotinorohkwáhtshera tánon wahonwatiia'tón'neke tsi ratinákere. Wahatiiarenenhsérón:ni tsi iah thaón:ton ahontá:ti tsi nihatiwennò:ten tánon iah thaón:ton ahonterihwahténkia'te tsi nihotirihò:ten ne tsi ionteweiënstákhkwaniónhkwa ne Koráhne rati'terón:tahkwe Ronnonkwehón:we, Othorè:ke Ratinakere (Inuit) tánon Métis. Iorihwáksen tsi ronakia'ke ne ratiksa'okón:a tho iahonniheie tánon iah nenwén:ton khesó:ti tsi nón:we ratinákerehkwe.

Ó:nen ratién:tere's ne kakoráhtshera tsi na'ká:iere ne Ronnonkwehón:we Tsi Ionteweiënstákhkwa Ronwati'terontákhkwa aoianerénhséra tánon tsi é:so wa'kahétkenhte ne Ronnonkwehón:we tsi nihotirihò:ten tánon tsi nihatiwennò:ten. Ronakia'ke wahonni:ron tsi ion'wesénhne tsi rati'terón:tahkwe ne tsi ionteweiënstákhkwa, ne'k tsi sénha ronakiohkowá:nen wahonni:ron tsi wahonwati'nikonhrakaré:wahte, wahonwatinonwenhsérario tánon wahonwanatsté:riste, iah tha'tehonwatihsnié:on ne ratiksa'okón:a tánon wa'thonwatikháhsi ne raotihwá:tsire né:e tsi iah tehotiarenenhsérién:tahkwe ne thé:nen nahotiié:ren.

Tsi nihonwatiierá:se Ronnonkwehón:we Tsi Ionteweiënstákhkwa Ronwati'terontákhkwa shé:kon é:so tehoti'nikónhare nón:wa wenhniseraténion tsi rati'nákere.

Kwah í:ken é:so tsi roti'satstenhsérá:ien tóhka na'teiohshénhséróte nihá:ti ne onkwehshón:a wahatithá:rahkwe tsi nahotiiá:tawen tánon tsi niio:re tsi wahonwatiie:sahte. Íó:ken tsi niio:re tsi é:so roti'satstenhsérá:ien tánon tsi rotiren'há:on tsi ní:ioht

aonsahontkwatá:ko. Iohá:ten tsi ronakiohkowá:nen iah teshón:ne's nón:wa wenhniseraténion tánon wahonniheie ohén:ton tsi niio:re ahonathonté:on aón:skon tsi rón:ton enshatirihwahserón:ni ne Koráhne Raotikoráhtshera.

Wahatién:tere'ne ne kakoráhtshera tsi iah tehón:ton tsi enshatirihwahserón:ni aori:wa wa'tká:tahste ne aonsahontkwatá:ko tánon aonsakarihwahserón:ni. Ne ón:ni, akwé:kon ne Ratikorahró:nón tánon Koráhne Raotikoráhtshera, sewahén:ton ténkta'ne, kèn:tho nón:we tsi iakwaiarenenhsérón:nis kanónhskon tánon aonsakerihwahserón:ni tsi nahotiié:ren ne Kaná:ta (Canda) tsi rotiiarenenhsérón:ni ahonwati'teron ne ratiksa'okón:a Ronnonkwehón:we Tsi Ionteweiënstákhkwa Ronwati'terontákhkwa.

Tsi nihá:ti ne thò:rha 80,000 shé:kon ronnonhne ne iehati'terón:tahkwe tsi ionteweiënstákhkwa, tánon akwé:kon ne kahwatsire'shón:a tánon tsi ratinakerahshera:ke, Koráhne Kakoráhtshera ó:nen kaién:tere's tsi iah tetkaié:ri tsi wahonwatiia'tón'neke tsi rati:teron tánon iákwere aonsaiakwarihwahserón:ni tsi eh niionkwaié:ren. Ó:nen wa'akwátóke tsi wa'kiakhikháhsi ne ratiksa'okón:a tánon raotihwá:tsire, tsi iah teionkwaienteré:on tsi enhatikwé:ni ne Ronnonkwehón:we tahonwatihsnie ne ronwatiio'okón:a tánon tsi wa'kiakwarénia'te ne kanen'shón:a ahatihsere na'teiotere'será:ne, tánon iakwahská:neks aonsaiakwarihwahserón:ni tsi eh niionkwaié:ren. Ó:nen wa'akwátóke tsi sótsi iotká:te wahonwatiie:sahte ne ratiksa'okón:a tánon iah teiorihwató:ken tsi ní:ioht tsi ronwati'nikón:rarahkwe tánon iákwere aonsaiakwarihwahserón:ni tsi iah tha'tekwahsnié:on. Iah ne'k ne tha'tesewatohétston shisewaksa'okón:a ne'k tsi wesewawiraién:ta'ne tánon iah tesewakwénion ne taietshisnié:on ne

ietshii'okón:a ne tóhsa ne shá:ka tha'tahontóhetste tánon ne iákwere ne aonsaiakwarihwahserón:ni tsi eh niionkwaié:ren.

Sótsi kari:wes ó:nen sewahnenhsá:ke shikáhere ne iókste. Ne tkaié:ri tsi í:i onkwá:wen tsi iókste tsi Tewakoráhtshera. Iah káneka teionáktote ne Kaná:ta (Canada) nón:we ne eh nika'nikonhrò:ten's tsi niká:ien ronaterien'tatshénrion ne Ronnonkwehón:we Tsi Ionteweiënstákhkwa Ronwati'terontákhkwa ne kátke'k aonsontónhete. Ó:nen kari:wes tsi náhe shisewaió'tákie ne aetsisewatkwatá:ko tsi nisewaiá'tawén:en tánon enkwakia'tahnahse. Kaná:ta (Canada) Raotikoráhtshera iákwere aonsaiakwarihwahserón:ni tsi niio:re tsi iah tetkwahnè:on tánon iakwari'wanóntha ne aesewaié:na ne Tsiionkwehón:we sewén:teron Kanatakónhshon nón:we tsi niio:re tsi iah tekwaia'takenhná:on.

Tsi ionkwaio'tákie aetsisewatkwatá:ko, aonsakarihwahserón:ni tánon akarihwaienawá:kon tsi niio'nikonhráksen tsi nihotiiá'tawén:en tsi iahonwanaténniehte Ronnonkwehón:we Tsi Ionteweiënstákhkwa Ronwati'terontákhkwa, tsi wahonterihwahserón:ni ne ahaterihwaié:na Ronnonkwehón:we Tsi Ionteweiënstákhkwa Ronwati'terontákhkwa kariwíson kiotáhsawen Seskehkó:wa 19 shískare, 2007 shiihserá:te.

Né:e wahatirihwá tsi wahonnikiohkón:ni Ronnonkwehón:we Tsi Ionteweiënstákhkwa Ronwati'terontákhkwa Tsi Tewarihwá:iohste tánon Tsi Tewarihwahserón:ni. Tsi nonakiohkón:ni thiká:te tsi ronwatinaktotá:ni ne ahatiweientéhta'ne ne akwé:kon Korahró:nón tsi kaianerénhséra ne Ronnonkwehón:we Tsi Ionteweiënstákhkwa Ronwati'terontákhkwa. Iorihwató:ken tsi ohén:ton nienkahawíhten tsi na'tetewátere ne Ronnonkwehón:we tánon Ratikorahró:nón, tsi niionkwakarò:ten tsi nikionkwé:nón, taetewataterihwakwénienhste tánon tewahská:neks ne skátne ohén:ton niaétewe né:e tsi á:se tsi tsiionkwa'nikonhráien:ta's tsi kahwatsirahni:ron, kanakerahsherahni:ron tánon ka'sátste tsi niionkwarihò:ten ienká:iehste ne tewakwé:kon sénha aetewa'sátste'ne tsi tewanakerahshera:ke.

Ohiarihá 11 shískare, 2008

Koráhne Kakoráhtshera Raotirihwá:ke
Thorihwaiéri'kó:wa Rakó:ra Harper,
Kaná:ta Raotikó:ra

